

Morning Dogri (NSD) National News Bulletin 19-11-2024

- प्रधानमंत्री नरेन्द्र मोदी होरें जी-20 शिखर सम्मेलन दरान भुक्खमरी ते गरीबी खलाफ कुलसंसारी गठबंधन शुरू करने लेई ब्राजील दी सराहना कीती।
- प्रधानमंत्री नरेन्द्र मोदी होर जी-20 शिखर सम्मेलन सवां बक्खरे विश्व लीडरें कन्नै मलाटी करगन।
- महाराष्ट्र ते झारखंड च होआरदे विधानसभा चुनां गितै मतदान लेई सब्बै इंतजाम करी लैते गए न।
- गृहमंत्री अमित शाह होर गुजरात च ऑल इंडिया पुलिस साइंस कांग्रेस दे स्वर्ण जयंति समारोह दा उद्घाटन करगन।
- दिल्ली एनसीआर च हवा दी म्यार होर माढ़ी गई ऐ ते 494 एक्यूआई तोड़ी पुज्जी गई ऐ।

<><><><><><>

PM G-20

प्रधानमंत्री नरेन्द्र मोदी होरें रियो डी जेनेरियो च जी-20 शिखर सम्मेलन दरान भुक्खमरी ते गरीबी खलाफ कुलसंसारी गठबंधन शुरू करने लेई ब्राजील दी अध्यक्षता दी सराहना कीती। इक सोशल मीडिया पोस्ट च श्री मोदी होरें आखेआ जे ब्राजील आस्सेआ शुरू कीती गेदी इक पैहलकदमी कन्नै दुनिया भरै च गरीब-भुक्खे लोकें गी उबड़ा चुक्कने ते खाद्य सुरक्षा गी जकीनी बनाने लेई कुलसंसारी एक्के कन्नै मदाद थहोग। उनें इस पैहलकदमी च भारत दे पूरे पराते सुखने दा भरोसा दोआया। प्रधानमंत्री मोदी होरें समाजिक, समावेश, भुक्ख ते गरीबी खलाफ लड़ाई बारे जी-20 शिखर सम्मेलन दे मुख् इजलास च हिस्सा लैता ते इस मौके पर बोलदे होई आखेआ जे इक धरती इक परिवार इक भविक्ख जी-20 दे ब्राजील शिखर सम्मेलन च बी उन्ना गै प्रासंगिक ऐ जिन्ना पिछले बरें नमीं दिल्ली च लग्गे दे सम्मेलन च हा।

<><><><><><>

G-20-Brazil

ब्राजील दे राष्ट्रपति लुइज इनानसिया लूला डी सिल्वा होरें भुक्खमरी ते गरीबी खलाफ कुलसंसारी गठबंधन बारे पैहले इजलास च सब्बै मिंबरे मुल्खें दे अध्यक्षें, मेहमान मुल्खें ते अंतर्राष्ट्रीय संगठनें दे नुमायंदे दा सुआगत कीता। इस पैहलकदमी गी ब्राजील दी अध्यक्षता च शुरू कीता गेआ ऐ। इस सम्मेलन च प्रधानमंत्री नरेन्द्र मोदी, दक्खन अफ्रीका दे प्रधानमंत्री .रामापोसा, ब्राजील दे प्रधानमंत्री लुआ डी सिल्वा, चीन दे राष्ट्रपति शी जिंगपिन, अमरीका दे राष्ट्रपति जो बाइडेन, बरतानिया दे प्रधानमंत्री कीर स्टारर्म सनें होर केई प्रमुख लीडर शामिल हे।

<><><><><><>

PM

प्रधानमंत्री नरेन्द्र मोदी होरें ब्राजील दे रियो डी जेनेरियो च जी-20 शिखर सम्मेलन दे सिलसिले च ब्रिटेन, इटली, फ्रांस, नार्वे, पुर्तगाल ते इंडोनेशिया दे लीडरें कन्नै मुलाकात कीती ऐ। इस दरान आपूंचै दे सरबंधें गी बेहतर बनाने पर चर्चा कीती गई। मोदी होरें ब्रिटेन दे प्रधानमंत्री कीर स्टारर्म हुंदे कन्नै बी मुलाकात कीती। उनें आखेआ जे ब्रिटेन कन्नै व्यापक सामरिक भ्याली भारत लेई बड़ी महत्वै आली ऐ। मोदी होरें आखेआ जे दौनें मुख्य पर्यावरण मुआफक ऊर्जा, सुरक्षा, नमीं काह्डें, टेक्नालोजी, बपार ते सांस्कृतिक संपर्क दे क्षेत्र च किट्ठे रलियै कम्म करना चाह्दे न। मोदी होर फ्रांस दे राष्ट्रपति इमैनुअल मैक्रो हुंदे कन्नै मुलाकात करियै उनेंगी पेरिस ओलंपिक्स ते पैरालंपिक दे कामयाब आयोजन पर ममारखां दित्तियां न। दौनें लीडरें अंतरिक्ष, ऊर्जा, जनसंपर्क दे होरने क्षेत्रें च किट्ठे रलियै कम्म करने पर सोच बचार कीता। मोदी होरें इटली दी प्रधानमंत्री जाजिया मिलोनी हुंदे कन्नै रक्षा, बपार, सुरक्षा ते टैनालोजी बारे गल्लबात कीती। दौनें लीडरें भारत-इटली सांझी सामरिक कार्ययोजना 2025-2029 दा सुआगत कीता। मोदी होरें नार्वे दे प्रधानमंत्री जोनास गार स्टोर हुंदे कन्नै मुलाकात करियै परती-परतियै बरतोने आली ऊर्जा, ग्रीन हाईड्रोजन ते समुंद्री अर्थबवस्था च निवेश ते नमीं काह्डें ते शोध गी बढ़ावा बारे सोच बचार कीता।

<><><><><><>

Maharashtra Election

महाराष्ट्र च कल होने आले असेंबली चुनाएं लेई सब्बै इंतजाम करी लैते गेदे न। राज्य च इक्कै गेड़ च 288एं सीटें पर वोट पाए जाने न। बीजेपी दी अगुवाई आला गठजोड़ महायुती, सत्ता गी बरकरार रखने दी कोशश करा करदा ऐ जदके महा विकास अगाढ़ी नै हकूमत च वापसी करने दी मेद लाई दी ऐ। कुल चार ज्हार 136 मेदवार मकाबलें च खड़ोते दे न, इंदे च दो ज्हार 86 आजाद मेदवार बी शामिल न। बीजेपी 149 सीटें, शिवसेना 81 ते अजीत पवार हुंदी अगुवाई आली एनसीपी 59 सीटें पर चुनां लड़ा करदी ऐ। कांग्रेस नै 101, शिवसेना चद्धव ठाकरे नै 95 ते एनसीपी शरद पवार नै 86एं सीटें पर अपने मेदवार खड़े कीते दे न। वोटें दी गिनतरी 23 नवम्बर गी कीती जाग।

<><><><><><>

Jharkand

झारखंड च कल दुए गेड़ दा मतदान होना ऐ। इमानदारी कन्नै वोट पोआने लेई सब्बै इंतजाम करी लैते गेदे न। इस गेड़ च 12एं जिलें च फैली दिएं 38एं सीटें पर वोट पाए जांगन। वोटें दी गिनतरी 23 नवम्बर गी कीती जाग।

<><><><><><>

Amit Shah

केन्द्री गृहमंत्री अमित शाह होर अज्ज गांधीनगर गुजरात च राष्ट्री रक्षा यूनिवर्सिटी थाहर ऑल इंडिया पुलस साइंस कांग्रेस दे स्वर्ण जयंति समारोह दा उद्घाटन करगंन। मुख्यमंत्री भूपेन्द्र पटेल होर बी इस समारोह च शामिल होंगन। गुजरात दे दो रोजा दौरे पर गेदे श्री शाह होर होरने केई समोराह रु हिस्सा लेंगन। इस ब'रे ऑल इंडिया वुलस साइंस कांग्रेस च भारतीय पुलस दे भविक्ख कुलसंसारी सर्वक्षेष्ट ते तकनीकी युधारें बारे चर्चा कीती जाग। आकाशवाणी थमां साढ़े संवाददाता नै जानकारी दिक्ती जे इस दो रोजा समारोह च नमें अपराधिक कनूनें च फारेंसिक ते तकनीक दी भूमका इस्तेमाल ते आपदा दे खतरे गी घट् करने च पुलस दी भूमका बारे बी चर्चा कीती जाग। इस सम्मेलन दा केन्द्री ते राज्य मूजब बलें दे प्रतिनिधि फारेंसिक ते शिक्षाविद च हिस्सा लेंगन।

<><><><><><>

Delhi Air Quality

राष्ट्रीय राजधानी दिल्ली च ब्हाऊ दी गुणवत्ता होर बी खराब होई गई ऐ। जंदी रातीं 10 बजे ब्हाऊ दी गुणवत्ता दा सूचकांक 494 होई गेआ। राष्ट्रीय राजधानी च ब्हाऊ च प्रदूषण गी दिखदे होई दिल्ली दे उपराज्यपाल विनय कुमार सक्सेना होरें दिल्ली दी सरकार गी सब्बने सरकारी दफतरें दे सें च तब्दीली करने दे निर्देश दित्ते न। एह आदेश दिल्ली सरकार ते मुनिसिपल कारपोरेशन दे सब्बने दफतरें पर लागू होग। दिल्ली मुनिसिपल कारपोरेशन दे दफतर बडलै साढे 8 बजे कोला लेइयै संजा 5 बजे तोड़ी खुल्ले रौहगन। दिल्ली सरकार दे दफतरे च बडलै 10 बजे कोला लेइयै संजा साढे 6 बजे तोड़ी कम्मकाज होग। एह नियम अगले ब'रे फरवरी म्हीने तोड़ी लागू रौहग।

<><><><><><>

IMD

मौसम विभाग नै अगले चऊं दिनें दरान उत्तर पच्छिम हिस्से च अगले 5एं दिनें दरान रातीं मे बडलै बड़ी मती धुंध पौने दी पेशगोई कीती ऐ। विभाग नै आखेआ ऐ जे उत्तर प्रदेश, राजस्थान ते मध्यप्रदेश दे किश हिस्सें च कलै तोड़ी धुंध पौहग। पंजाब, हरियाणा ते चंडीगढ़ च शनीवार तोड़ी धुंध पाने दा अनुमान ऐ। अज्ज दिल्ली ते राष्ट्रीय राजधानी क्षेत्र च घनी कोला दरमेयाने दर्जे दी धुंध पौने दा अनुमान ऐ। तमिलनाडू, पुदुचेरी ते कैराकल च अज्ज भारी बरखा पौने दा अनुमान ऐ। तोआई केरल, अंडेमान निकोबार टापुएं च अज्ज हल्की थमां दरमेयानी बरखा नेई सकदी ऐ।

<><><><><><>